

摘藻堂四庫全書薈要

集部

欽定四庫全書薈要

集部

御選明詩卷八十五

詳校官原任主事_臣李斯咏

欽定四庫全書薈要卷一萬八千五百八十五

集部

御選明詩卷八十五

七言律詩十八

王懋明

同鴻山公遊吳尚寶水雲居

時吳復
宦京師

公子高標抗俗氛
翠微開館坐氤氲
回塘暗引荆溪水
虛閣常蒸玉洞雲
花隱房櫳春不去
席依松竹晝疑曛
主人却有家山勝
鶴怨空巖詎忍聞

姚咨

送人遊句曲

鳬舄鶴袍辭世紛
望山峯下禮茅君
祈年欲啖金光草
好道寧披玉檢文
絕巘琳宮當日見
上方清磬隔花聞
山中倘遇陶弘景
願乞松風與白雲

郊居自遣

前溪烟水路漫漫
長日郊居性所歡
老去自知雙鬢改
春歸一任百花殘
閒窓寂寂晴絲繞
高樹陰陰鳥夢寒

學易由來諳物理慣將消息靜中看

岳岱

暮秋遊眺

千里秋風雙眺目孤懷落日共悠然
村居繚繞寒原外人鳥縱橫夕遯前
山寺紫烟盤曲磴石梁黃葉擁流泉
此因病肺時行藥物色幽鮮一可憐

陳鳳

春夜阻舟尤村渡華子攜酒見訪

盤谷春雲覆竹扉
夜船燈火宿霏微
故人何意一尊共
野渡不堪孤雁飛
世路波濤渾不定
客程風雨竟誰依
重來應待晴芳好
柳絮桃花滿釣磯

吳擴

同華許諸君橫塘舟中漫興

四月溪深花氣微
遠烟明滅閃晴暉
柳條蘸水碧于染
麥穗連雲黃不稀
雙燕掠波分畫槳
片霞生雨灑春衣
同舟況是高陽侶
汗漫三江未擬歸

姚充

寄懷朱宗魯太醫

憶昔都城醉故人，睽攜二十四迴春。
心隨明月長飛夢，目斷停雲欲愴神。
藏室書成周柱史，丹箴筆紀漢宮臣。
何時得副還山望，芝草琅玕共采真。

鄭坤

同王駕部遊慧山題秋聲小閣

輞川居士共襟期，小閣登攀欲暮時。
山色可淹今日酒，

秋聲還憶去年詩
閒雲竹掃無留影
老樹藤纏不剩枝
景物漸隨人事謝
隔窓幽鳥未曾知

王叔承

風雨泛太湖宿松陵長橋漫興

羣飛鷗鷺逐鷓鴣
予亦揚帆赴杳冥
灑鬚湖風寒氣白
打船山雨浪花青
水邊萬樹來江縣
雲裏雙峯出洞庭
七十二橋燈火亂
野煙沽酒宿漁汀

黃姬水

登三山宿聽江樓經落星崗李白換酒處

空巖香閣叩棲禪坐見歸禽沒遠天
鐘渡寒潮鼉峽外帆移芳草鷺洲前
春江半是巴山雪暮嶺全迷楚澤煙
忽憶仙人換酒處飄零今古一悽然

息園賞芍藥得寒字

淺白深紅鬪合歡絲絲香雨晝難乾
直須一日三百盞無那東風十二欄
水上新傳錦字艷樓頭長怨玉簫寒
可憐春色隨花盡留興還應帶月看

賦得長干柳

春煙嫋嫋雨濛濛
梁苑隋堤一夢中
纖葉空憐半江水
殘絲猶怯五更風
永豐園裏情無限
蘇小門前路乍通
寄語飛花好棲泊
莫教飄蕩恨西東

張太學載酒同劉侍御彭秀才石佛院看芍藥
因懷龍灣徐太守

山繞吳宮舊館娃
清江曲曲綠楊斜
偶移畫鷁同杯酒
不道空門有艷花
白日簾櫳堪幕霧
夕陽欄檻更添霞

美人不見偏惆悵欲折瓊枝感歲華

中秋集定慧寺時自金陵暫歸

共喜中秋河漢明東林坐見月華生青天不染金波冷
古寺無人玉漏清竹栢空階交藻影蛩螢深巷雜砧聲
故鄉番作思家夢此夜長安兒女情

金陵寒食

禁煙時節若為情春草芊芊春水生不挽人行惟路柳
慣催花落是宮鶯秋千影裏嬌嘶馬醴酪香中白泛觴

風雨滿城愁旅鬢怕言明日是清明

上巳日石湖王百穀席上送童山人子明

詞客來遊修禊辰澄江十里綠楊津喜尋勝景酬佳節
愁對青山送遠人水上傳觴浮露氣林間著屐藉花塵
吳臺越嶠同芳草無那明朝兩地春

落梅

昨日看花花影重重來惆悵幾枝空隨萍半積芳池上
學絮全飄畫閣東秦隴迢迢悲夜月漢宮憔悴怯春風

臨觴莫恨凋零盡，留得鄰家玉笛中。

王穉登

弢光菴

浮嵐空翠氤氲谷，靜人聲寂不聞。
處處引泉遙接竹，重重躡石上干雲。
山將秋色晴偏好，海與江光遠不分。
欲對老僧談半偈，林間不覺又斜曛。

雨中遊茅山

碧殿陰陰倚翠微，春寒雲薄雨霏霏。
桃花石上開俱白，

燕子山中濕不飛入戶青嵐沾客鬢有時香霧見仙衣
塵顏未受還丹訣玉闕瑤臺何所歸

無題四首

一朶千金泣露斜簾櫳難護幕難遮吳王城上同看月
伍相江邊獨浣紗楊柳名為離別樹芙蓉號作斷腸花
舊時鄰舍俱新主莫辨東鄰是宋家

昔日吹簫鳳下來如今鳳去只荒臺劒分安得重歸匣
水覆難教再上杯倩酒禁愁何日醉待花消恨幾時開

無情最是窓間雨吹入空牀生綠苔

芙蓉江上露淒淒楊柳樓前月影低燕入朱門藏不見
馬過花巷憶還嘶藕絲無力終愁斷萍葉隨流不肯齊
信有銀河千萬里人間隔斷路東西

玉釵中斷兩鴛鴦繡枕平分半海棠戲擲櫻桃奩尚在
學吹楊柳笛還藏紅顏夢裏將為石青鬢愁中易作霜
錦字消磨鴻雁絕門前咫尺是衡陽

天平道中看梅呈陸丈

新春日日雨霏霏
雨後尋春願不違
花近翠微苔作樹
人行香徑雪生衣
折從野岸俱無主
開入僧家盡掩扉
誰似丈人能好事
衝風踏凍不言歸

奉答汝南公

平津閣上夜題詩
繡牘親裁與項斯
字比宮雲俱五色
情將禁柳共千絲
袖中攜出香偏入
馬上看時月故隨
自是陽春元寡和
莫言寒屋報書遲

答袁相公問病二首

斜風斜雨竹房寒
雲裏蓬萊枕上看
愁過一春容鬢改
吟成五字帶圍寬
書生薄命元同妾
丞相憐才不論官
泣向青天懷烈士
古來惟有報恩難

形骸土木佛燈前
黃閣情深有夢牽
喘似吳牛初見月
瘦如遼鶴不冲天
詩題半作逃禪偈
酒價都為買藥錢
知己未酬徒骨立
一生孤負佩龍泉

舟中與建初話舊

十載行藏半未齊
聞君論舊益淒淒
汗從何晏朱衣拭

書覓羊欣白練題歌是竹枝容易和淚成珠子不輕啼
干將已是徐君劍明日扁舟下剡溪

贈顧杭州貞叔

才高誰識顧君平身著青袍世所輕楊柳不曾湖上看
芙蓉元在幕中生馬頭雲斷家山色官舍潮連夜雨聲
流水白雲心盡折丈夫辛苦為微名

會稽道中

江東名郡古無雙處處青山照玉缸竹箭一流明客枕

芙蓉兩岸夾船窓
清猿夏斷稽山廟
急雨朝平孝女江
此地何須歎淪落
買臣頭白始為邦

碧雲寺泉上酌酒與朱十六

雲中流下不勝清
石瀨濺濺只自平
宛轉浮杯人不醉
潺湲到枕夢難成
分厨已足千僧汲
出寺能為十里聲
同是黃塵騎馬客
與君相對濯冠纓

湖上

鷓鴣荷葉滿秋煙
太液滄沱處處連
碧浪半湖雖似鏡

銀鞍十里不如船堤同隋苑能栽柳歌欠吳姬憶采蓮
不為無魚思故國他鄉風物本淒然

至日懷諸太史陪祀南郊

圜丘馳道草芊芊曠典重逢御極年聖壽長如南至日
皇恩高似北溟天葭灰應氣迎鄒律松籟含風入舜絃
最羨翰林供奉客揮毫先進慶雲篇

玉皇閣對雪懷黃丈淳父

雪後登樓興未賒仙人香案挂寒霞帝京初曉渾如玉

宮樹先春已著花，人意喜時消作水。
馬蹄行處踏為沙，黃公壚畔新醅綠。
遊子如何不憶家。

長安立春日

城上高樓五鳳皇，春雲日日轉年芳。
鏤金作勝家家帖，剪綵為花樹樹妝。
太液池中波早綠，昭陽殿裏柳先黃。
隴梅消息無人寄，斷盡江南思婦腸。

送吳中丞之金陵

建業青山是帝都，暫勞開府握軍符。
花間朱鷺饒歌曲，

江上黃龍水陣圖玉節中丞新盪寇樓船諸將舊平吳
不知燕子磯前地容得陳琳草檄無

溪上步月簡秦方伯胡侍御

如海侯門路不通溪流寂寂霧濛濛誰家客許花間入
何處尊能月下空敲散彩雲鐘隔水吹殘玉漏笛臨風
南樓酒伴東山侶半憶庾公半謝公

新春感事

信有清風不厭貧吹簾入幌轉相親紅顏薄命空流水

綠酒多情似故人服藥難辭星入鬢閉門長與竹為鄰
黃金散盡真堪惜前日親知是陌塵

龍湫

石潭寒水翠如苔日暮寒蘿俯澗隈投綆漫言浮海出
蕩舟剛及隔巖回泉飛暗作千山瀑龍去先從二月雷
不飲何須愁笑客桃花洞口未曾開

乙未人日對雪簡沈從先

春陰寂寂最堪憐人日登樓雪皎然不肯共消惟白髮

且留相映有青檀桃花玉勒看山騎蘭葉銀箏載酒船
笑殺洛陽袁處士閉門終日只高眠

重遊武林

十年不踏西泠路此度重遊感舊時楊柳忽驚枝盡老
芙蓉應笑客來遲敲門月下僧猶在載酒亭中鶴未知
明日南屏山麓寺壁間還覓舊題詩

錢象先移居

三年並舍接清言一日移家避俗喧僦廡橋邊真隱士

射潮江上舊王孫垂簾柳不遮鄰巷葢瓦藤纔隔對門
此去牆東元咫尺相過莫厭倒芳樽

送曹能始進士北上

風流蘊藉更才華年少成名乍起家銀甕青絲吳市酒
竹爐紗帽建溪茶車同潘令人人果筆似江郎夜夜花
去覓江東二三子帝京明月醉琵琶

贈長洲蔡明府

廿年京洛羨飛騰此地重逢不負丞走馬泥塗朝帶雪

棲鴉官舍晚如冰橋邊烏鵲非銀漢塢內桃花隔武陵
一枕黃梁俱莫問君依遷客我依僧

雪中梅花

二月春光雪尚飄看梅獨坐思無聊銀花亂綴難分萼
玉樹交加莫辨條粉似傳來容易褪香偏留却不同消
一般飛入妝臺裏獨讓殘英點額嬌

不渡錢塘簡屠長卿

東望錢塘去路賒鄞山鄞水隔天涯非關雪夜空迴棹

其奈炎蒸苦憶家
短髻烏蠻簪茉莉輕衫白氎繡桃花
採蓮亦有江南女何用扁舟渡若耶

送蔣都護入蜀

瞿塘峽口水初生
都護樓船入蜀行
地到益州皆沃野
營開寶叟盡雄兵
千雲鳥道三千里
掛樹猿啼一兩聲
欲卜封侯何日事
成都市上問君平

贈劉汝臨

劉郎才思長卿看
帝里風光駐馬鞍
村過杏花春酒綠

磯登燕子暮江寒潮平桃葉同衣帶雨熟枇杷似彈丸
歸去稽山當仲夏園林竹箭長千竿

中秋日送錢象先遊豫章

西風征雁不堪聞病裏題詩忍送君月與離樽今夜滿
秋將行色一時分匡廬木落山如黛彭蠡霜寒水似雲
公子西園賓客盛好陪飛蓋共論文

宣城友人移居白下

南朝山色近移家朱雀橋通路狹斜宛水月從江樹出

敬亭雲被苑牆遮
橫舟渡口尋桃葉
沽酒村邊問杏花
聞道章臺街畔柳
不堪繫馬只藏鴉

送徐惟和還閩兼寄惟起

未把并州作故鄉
送君重與賦河梁
吳宮蟋蟀方啼月
越國芙蓉未著霜
賓從琴樽忘逆旅
弟兄漁獵憶鄰莊
還家且說西堂夢
細擘黃柑薦酒嘗

林純卿卜居西湖

藏書湖上屋三間
松映軒窓竹映闌
引鶴過橋看雪去

送僧歸寺帶雲還輕紅荔子家千里疎影梅花水一灣
和靖高風今已遠後人猶得住孤山

王逢年

登瓜州酒樓留別

楓樹清霜戀客杯日高京口曙煙開帆飛細逐通州下
江影青浮北固來擊楫關心鴻不到登樓何事角頻哀
秋風黃葉平原里此去遙應首重回

袁景休

送沈嘉則遊中原兼訪戚將軍

中原此去欲如何把酒聞君慷慨歌
道上霜寒逢白雁馬前木落見黃河
五陵煙雨秋難盡三輔風雲氣尚多
記得少年曾學劍壯心猶自憶廉頗

朱邦憲

寒夜集家兄園居有懷唐光祿三丈

騎馬衝寒共出城一尊宵宴愜歡情
棋聲到樹鳥不定池影入窓人倒行
林滿清霜山更瘦地留殘雪月逾明

天涯忽憶離羣客長樂聞鐘夢未成

朱正初

無題

長干車馬少年同此夕
翻疑似夢中楊柳有聲吹作笛
梅花無數落隨風
春山尚闕顰間翠
夜月都消枕上紅
惆悵當時歌舞處
夕陽猶照小橋東

葉權

感遇

花暗重門燕遶梁珠簾高捲鬱金堂香雲縹緲來青瑣
初日玲瓏照寶妝蜀錦畫長鋪翡翠吳綾春暖卧鴛鴦
含情飲恨風流盡笑殺羅敷自採桑

孫七政

寄懷禹錫阿咸僑寓百花洲上

蕭然窮巷一茅廬却喜頻迴長者車避地不忘梅福隱
移家還傍伯通居春風洲上花猶發夜月門前柳自疎
若憶嗣宗長嘯處豈堪回首重踟躇

袁昭陽

詠陽山草堂竹贈漳河岳山人

草堂正倚陽山曲，裊裊琅玕澗水潄。
風塢籜辭同蘚碧，雲林梢長接空陰。
雨晴簾捲秋如許，日午尊開暑不侵。
雲林梢長接空陰，雨晴簾捲秋如許，
日午尊開暑不侵。過客留連盤石坐，
求羊應許更攀尋。

陸倕

送友遊武夷

秋來天外結幽期，一月看山到武夷。
石壁負舟仙去後，

天風吹袂獨吟時
花深九曲煙霞寂
月出千峯猿鳥悲
我亦江湖從孟浪
聞君長往不勝思

除夕

病拋簪紱風塵外
老愧詩名五十聞
華髮漸看青鏡曉
草堂重伴碧山雲
春歸柳岸啼新鳥
歲晚江村帶夕曛
獨酌椒花燃柏子
閉門空自歎離羣

王延陵

洪光寺同崑崙山人

洪光高閣杳林端
繚繞雙過錦繡鞍
曉日乍開仙闕曙
春雲猶弄上方寒
窓中猿隨青天影
樹裏人行赤玉欄
已分息機甘晏寂
長安風霧任漫漫

黃鳳翔

坐澗石

石榻苔茵倚翠岑
臨流坐久落花深
水涵遠岫千層影
風送輕雲一片陰
狎鳥窺人如欲語
幽蘿對我共無心
誰云海上蓬瀛隔
咫尺尊前便可尋

寄題東塢別業

槎江一曲水雲多，竹塢荆扉擁碧莎。
樹挂羅浮煙外月，橋橫滄海晚來波。
芳亭雨歇閒鷗鷺，別沼秋深老芰荷。
我向江山遙騁望，飛鴻近日少經過。

大柳驛夜行

長安雲樹渺蒼蒼，歲暮驅馳足馬忙。
日落暝煙迷野色，夜來殘雪帶寒光。
數聲犬吠鄉村近，一徑泥深道路長。
忽望青燈懸古寺，遲回欲借遠公房。

巖前方亭小坐

空亭谷口敞晴暉
迢遞層巖一徑微
翠壁丹崖開寶地
寒花細草拂荷衣
苔邊雲影僧頻掃
松下碁聲鳥不飛
選勝何須方外去
浮生到此已忘機

南溪泛舟憩黃大參溪館

棹歌泛泛向滄洲
夾岸松陰為少留
看竹芳園還問主
懷人雪夜獨回舟
風搖細纜天新雨
潮湧空江月欲流
漁父磯頭垂釣罷
可能從我五湖遊

沈一貫

若邪溪獨往

編竹為船任所之，高低白石上灘遲。
水波不待春生後，山色偏多雪霽時。
到處溪邊憐謝客，誰家村裏問西施。
小橋野店人爭席，縹緲松煙入午炊。

對月憶家園

月如銀鏡好當臺，酒與金波一色開。
乍似水南清磬發，還疑天末故人來。
花間香霧蜂堪釀，雨後閒雲燕欲回。

蘆笋正生梅子熟小池連夜長莓苔

于慎行

冬至南郊扈從紀述和陳玉壘太史韻六首

聖后乘乾奉帝禋日躔南陸協靈辰九闕肅啓天門鑰
萬姓歡隨御輦塵樓雪初融丹禁曉葭灰微動玉衡春
虛慙珥筆親文物實有甘泉賦未陳

玉闌東畔畫簾前到處常隨豹尾旋聖代儀文今日盛
儒臣雨露向來偏琅函賜錦馳中騎寶鼎分餐出御筵

齋室受釐應有問朝回猶恐夜深宣

絳闕陰沈啓秘局鑾輿肅穆款真庭霜凝碧落天衣濕
月上仙壇玉樹青帝座三重開萬象雲門六變走羣靈
祠臣秉笏香煙裏時向珠躔望景星

絳節氤氲上太清紫煙縹緲冠層城鵷行不動瑤池影
鳳幄微聞玉藻聲律應一陽璇象轉福凝五位泰階平
禮成回蹕傳行漏百尺華燈闕下明

燈火薰天夾路旁屬車旋處翠華張非煙擁蓋璇霄麗

若月乘輪御陌長十里香花連泰時千門鼓吹徹昭陽
皇誠已自通天貺萬祀應知寶祚昌

紫氣葱葱繞禁廬南郊近日履長初皇王禮樂光前殿
侍從聲華滿後車漢時龍麟金匱紀周臺雲物彩毫書
雄文亦是鄉人似齊客談天恐不如

館課冬至齋居

緹室灰飛晷欲長清齋仙館坐焚香雪殘樓閣虛瓊樹
月出簷裾滿玉堂筆望五雲迎舜日心隨一線入堯裳

明朝負橐趨陪地只在瑤壇帝座旁

在告書懷東可大

金門何事轉愁予日見紅塵上錦裾祇為思歸常數雁
幾因多病欲焚魚鄉心瓦上三更雨客計牀頭數卷書
幸藉自休聊閉閣文園從此卧相如

病中遣懷

三月孤齋斗帳寒十旬休沐主恩寬閒翻藥裹呼兒晒
細檢詩筒借客看千里鄉心芳草綠一年春色杏花殘

浮踪去住渾無賴行路人間信是難

新都程君房寄墨數螺道中為稅使所摧戲作
志感

客卿聞已渡江淦烏有何從問藝林楮國交遊成落莫
松侯封爵付銷沈思玄但檢張衡賦守黑空遵老氏箴
為語中人休錯誤隄靡厝不化黃金

丙子二月初與經筵進講紀述

延英別殿倚平臺問道恭承步輦來講席平依丹地轉

經函近對御筵開凝旒睟穆聞天語委佩從容列上台
聖學方隆恩禮茂儒臣長此奉康哉

丙子七月初侍日講紀述

內殿雲深啓法筵隔屏初聽玉音宣宮臣舉案趨宸幄
閣相垂紳拱細旃壁影絲絲浮繡網籤頭字字指瑤編
氷兢祇懼終無補未覺身依尺五天

丁丑三月上親灑宸翰大書責難陳善四字以
賜

龍箋一幅日星光天藻昭垂自尚方久向橫經窺聖繡
還因納誨奉奎章琅函想見仙毫動蓬室驚聞御墨香
儒術承恩逢景運非同常侍漫登牀

丁丑五月大旱雩禱上齋居御講頒賜素蔬一

盒

雲漢憂歌歲事艱桑林虔禱聖心殫祈年不輟金華講
減膳猶分玉箸餐始見仙盤疑泛露却嘗寶饌是調蘭
崇朝膚寸紆宸想霖雨應騰四野歡

戊寅正月進講賜大紅織成段衣一襲

講殿朝朝聖渥頻賜衣又見出楓宸織成共識金梭巧
貢到初開錦樣新色借宮雲紅近日香浮仙佩暖宜春
垂裳幸值軒唐理補袞無勞愧許身

元旦賜門神掛屏葫蘆等物歲以為常

節啓青陽歲籥新金人十二畫為神韶華自合留天府
御氣惟期洽近臣綵勝仍分仙禁縷雲屏况借漢宮春
却憐寂寞揚雄宅門巷恩光接紫宸

端午賜黃金艾葉銀書靈符等物歲以為常

芙蓉闕下玉書宣
午日恩頒侍從前
寶葉光分仙島月
靈符香綴御爐煙
歲時舊自荆人記
風俗曾經漢史傳
聞道宸遊臨太液
龍舟鳳管畫樓邊

八月十七日萬壽聖節賜白金文幣及鏤金萬壽福祿篆字銀書黃朱靈符等物歲以為常

華渚祥開禁籞天
恩光每覺近臣偏
函加白壁來天上
錦散紅雲出日邊
裁就靈符華舜旦
鑄成寶畫記堯年

銜恩効祝慙無補金鑑先時獻御筵

十一月二十九日聖母萬壽聖節賜金幣鏤金篆字黃朱靈符等物歲以為常

長樂凝和婺彩光侍臣沾貺聖恩長璆琳內苑開銀甕
雲錦天機隱御香鳥跡呈書仙筭永龍文紀瑞寶符黃
朝來碧落簫韶度內殿親稱萬壽觴

冬至恭侍慶成大宴

南郊夜燎泰壇煙內殿朝開大慶筵兩陞衣冠承湛露

千門鐘鼓震鈞天親瞻玉几雲霄上久泛仙杯日月邊

溫旨三傳咸已醉歡聲動地未央前

宴中三奉玉音初云官人酌酒再云

斟滿三
云飲乾

賜畫面川扇

九華綵扇貢已東午日承恩出漢宮雲影金泥黃帕解
花開寶繪玉函空擎來濯錦江頭月動處披香殿裏風
自是君恩在懷袖惟將皎潔矢丹衷

賜鮮笋

殊錫光生玉笋班曾從青簡賦檀欒蒲筐乍解香盃座
錦籜初分綠滿盤一飯疑含仙禁雨三秋猶憶北窓寒
慙無鳳實儀千仞祝有龍孫長萬竿

賜鮮藕

芙蓉別殿曉風涼玉井靈根出水香薦熟方聞開寢廟
賜鮮已見布朝堂冰絲欲斷鮫人縷瓊液疑含閨苑霜
憶昨金鰲橋上望紅衣翠蓋滿銀塘

賜鮮枇杷

嘉名漢苑舊標奇北客由來自不知
綠萼經春開籠日黃金滿樹入筐時
江南漫道珍盧橘西蜀休稱薦荔枝
千里梯航來不易懷將餘核志恩私

賜鮮鮓魚

六月鮓魚帶雪寒三千江路到長安
堯厨未進銀刀鱠漢闕先分玉露盤
賜比羣卿恩已重頒隨元老遇尤難
遲回退食慙無補仙饌年年領大官

丙戌冬至南郊扈駕聖母軫念天寒特賜薑蘇

杏仁一盒

黃門飛鞚到天壇傳道東朝賜講官祇為甘泉勞扈從
特從溫室下盤餐調蘭欲動先春色斲桂渾消午夜寒
慈念殷勤知有望慙無一字罄衷丹

丁亥二月奏進大明會典賜白金文綺宴於南
宮仍給三代誥命

九朝謨烈玉書藏祖德宗功萬祀昌漢代不須脩故事
周家惟用考前王頒恩內省溫綸降賜宴南宮廣樂張

就裏儒臣稱最渥特煩三錫下龍章

己丑六月三品考滿荷蒙聖恩遣內使及門齎
賜羊酒寶鈔

典禮南宮侍禁筵還因奏績荷恩偏牢尊特遣中涓賜
楮幣親從少府傳漫擬恩華同八座猶將名字廁羣仙
多慙衮職曾無補一卷牙籤十四年

辛卯九月乞休得請欽遣內使齎賜路費寶鈔
次日又遣內侍齎賜白金文綺蓋六卿日講各

有特恩也

乞休十疏始抽簪勅使連朝出禁林
脩物卿臣元自厚殊榮講幄舊來深
初衣已卷天機錦歸橐猶函內殿金
慙負宸慈何以報惟將丹扆效餘箴

送朱養淳太史冊封周藩

蓬萊闕下五雲飛桐葉封函出帝畿
漢苑花香隨使節河橋柳色上征衣
天臨玉署恩偏渥星近銀河夜更輝
試向天津橋上望銅街無處不芳菲

林景暘

雨聲

暮雨空山掩竹扉
若聞天籟一燈微
漫隨落葉臨窓下
遙帶疎鐘度嶺飛
林靜淒淒和玉漏
巖虛歷歷中金徽
那知驚破家鄉夢
猶有周南客未歸

泛泖

澄湖浩淼接長天
一島孤浮塔影懸
雲外波濤開澤國
鏡中城郭想由拳
數行鷗鷺依晴渚
九點芙蓉隔暮煙

便欲乘槎御風去此身如在斗牛邊

富陽曉望

席挂天風出富陽江流曲折溯洄長
譙樓山聳晴曛麗雉堞雲連宿鳥翔
幾處菑畲收晚稻萬家碁枰倍秋光
更勞地主能相送直到桐廬夜未央

張位

江天閣

片帆烟雨暮潮間山在江心樓在山
波影垂寒新石塔

鐘聲破寂舊松關
好峯當面雪明滅
流水何情客往還
樹外夕陽城市近
喧聞車馬抗塵顏

范謙

遊洪陽洞

絕壁攀蘿一竇穿
洞中虛豁敞壺天
青蓮倒插渾無地
玉筍長生不記年
遊客漫尋燒藥處
山童猶識種芝田
為逢賢令雙鳬鳥
暫借雲窩半日眠

邵陞

過拜將臺懷古

千載遺踪表故臺殘雲縹緲夕陽開三川佳麗興王地
百戰勲名大將才此日江山空草木當年壁壘半蒿萊
登臨不盡英雄恨風急寒沙過雁哀

朱孟震

春日金沙寺訪羅孝廉元我

春水金沙是舊遊春風黃鳥況相求馬蹄一逕穿雲入
花氣千林帶雨浮詞客雄文巴蜀檄故人清興剡溪舟

草堂踪跡今猶昔好為狂夫十日留

謁張桓侯廟

英姿颯爽氣雄哉恍惚晴霄風雨來
一代君臣元伯仲千秋祠廟倚崔嵬
乾坤已限三分業熊虎空懷上將才
正是雲安春月夜杜鵑啼徹不勝哀

龔勉

送王會泉武庫出守永州

仙郎戎政擅才名簡命熊幡向楚城
車騎舊瞻司馬節

檐帷新識使君旌
九疑南接湘江遠
五嶺東連粵路平
遙想行春風日好
瘴煙消盡百花明

張一桂

送張明成翰撰奉母還江西

幾年橐筆侍承明
奉母潘郎暫此行
宮錦晝歸誇戲綵
江鱸秋美足為羹
孤帆帶月搖鴻影
落葉隨風作雨聲
我亦慈親鄉思切
那堪回首大梁城

送王蟾芬同年入閩

繡服承恩下玉墀使君南去獨褰帷寒雲雁影天涯遠
驛路梅花歲暮時把袂且沽燕市酒逢人須寄幔亭詩
可憐舊日瀛洲月又向樽前照別離

蔡文範

遊南岳

縹緲仙臺紫氣浮煙籠玉座儼垂旒地包荆楚標南紀
江合沅湘向北流牲帛千秋周祀典衣冠五月舜諸侯
塵緣未斷慙仙骨金簡雲書何處求

赤帝高居小梵天衆峯羅列擁階前秋經絕壁風雷起

有風雷洞

醉倚雙臺日月懸

上有望日望月二臺

誰道人騎黃鶴去我

今寒抱白雲眠莫言此夕非冲舉已隔人寰丈九千

誌載

祝融峯高九千丈有奇

顧大典

朝謁

珮聲隱隱步委蛇天樂初傳曙色低一命乞為秦博士
十年重見漢官儀清時幸際風雲會華袞新瞻日月姿

猶憶先皇親御極曾將三策獻彤墀

送張郎中出守辰州

分手風煙悵舊遊且憑樽酒暫淹留
愁來欲擬張衡賦君去真同郭泰舟
征旆遠從三楚沒離心先逐五溪流
欲知何處懷人切雲白山青獨倚樓

秋日同華水部登宣武門城樓

縹緲層樓四望開五陵草色對銜杯
寒衣未授清砧急暮角頻吹朔雁來
漢闕晴光連睥睨秦關紫氣接蓬萊

登高正爾逢蕭瑟落日懷歸賦自哀

五雲道中懷故園兄弟

千盤石磴迥誰攀
疋馬遙從鳥道還
澗草暗侵池上夢
林花聊破客中顏
飛泉噴壑虛疑雪
宿雨蒸嵐不辨山
十載刀頭心已折
浮雲回首是吳關

沈位

中秋

秋光長與翠華連
況是中秋更可憐
城闕影高雲裏見

芙蓉露冷沼中妍
誰家笛弄江南曲
幾處鴻飛塞北天
此夜清輝應莫負
人生能見幾回圓

張鎰

寄父和甫謫戍西寧

荆南偶接故人書
為悉關門近起居
萬里獨看營外月
孤身誰念釜中魚
辭劉徐庶心元苦
折檻朱雲願不虛
秦地日聽邊塞曲
楚歌相和調何如

鍾庚陽

劉在南直指遷郴州余亦謫守廣德同發潞河
投贈

繡衣使者下蘭臺
愁說雙旌潞水開
自是聖恩寬逐客
却從謫宦見仙才
山過衡嶽孤帆轉
路入瀟湘雁影回
余亦南行賦歸去
秋風天末幸追陪

陳允升

秋柳

陌上寒煙鎖柳條
幾株殘縷況飄颻
章臺舊夢羞蛾黛

繡閣深歌怯舞腰
驛路秋高忘折贈
灞橋月白怨征軺
封侯莫遣還相憶
來日東風信未遙

劉克正

春雪

乍覺輕寒薄
太空凍雲舞
絮一宵同點穿
簾幕
渾成雨
飛入園林不待風
萬里江山春寂寞
九重宮闕玉玲瓏
仙郎天下聞高調
一曲誰能和郢中

劉元震

月下聽琴

明河澹月挂疎林此夕張君綠綺琴一曲正堪清夜聽
幾人先動故園心寒催兔杵霜前響靜愛龍脣泓下吟
流水高山意何限遙遙天路彩雲深

吳中行

潞河旅懷

拂袖歸來意豁如故園生計豈應疎門前已少相過轍
架上仍多未讀書暮雨苔痕封僻徑夕陽山色滿精廬

隔湖二頃沮洳地築土疏泉學種魚

馮時可

贈梁叅軍

共說梁鴻杜德機歸來八十隱蓬扉身如老樹霜中挺
官似春花夢裏飛山墅田腴收稻早里門江近得魚肥
何時握手星巖側剪韭開尊共夕暉

端州秋夜

端州物候似江東雨後煙氛萬里空
傍郭潮生荔浦月

虛堂香送桂枝風
城臨石室來霜鶴
路近星巖曳彩虹
銀燭清尊應自賞
中朝誰念一衰翁

禹錫山居得深字

水曲山圍幽且深
茅齋窈窕杜招尋
寒淙漱壑飛清響
密靄生林結翠陰
靜洗六塵除綺障
卧遊八表曠虛襟
爐香茗椀能消日
一任閒階苔蘚侵

嵩山

蒼然岳色壓天中
陰壑陽崖望不同
遠水如雲浮落日

飛泉似雪舞迴風
石牀夢醒羣魔伏
金地心開萬境空
誰可入林相把臂
朗公今在玉溪東

金山寺

樓臺傍水淡秋容
寒影涵來翠靄重
地控海門千萬里
江浮天柱一孤峯
騰空白浪驚棲鶻
出洞陰雲起卧龍
壯觀生平曾更幾
維舟徙倚聽煙鐘

劉伯淵

園居

松際茅簷隔小橋
水濱穿圃亦通潮
得閒獨坐翻書卷
有客相過慰寂寥
方竹歲深裁作杖
大壺霜落剖為瓢
年豐飽喫青精飯
莫問仙山路近遙

梁岳

暮春燕京懷歸

長安春盡落花多
越客思歸意若何
節序幾從愁裏變
家園頻向夢中過
西京形勝雄三輔
北雁音書隔九河
燕市酒壚堪取醉
莫將留滯起悲歌

李應徵

送康元龍還閩時歸自海上

書生尊俎笑談兵
幕府還聞倒屣迎
九寨昔曾驅馬度
五湖今許放舟行
海天雲樹無諸國
客館鶯花樵李城
莫道倦遊歸計拙
春風應念倚門情

重送萬和甫還江西

去歲今年兩度回
寸心遙指白雲隈
城頭擊鼓天未曙
江口候潮船正開
望望美人南國遠
淒淒孤雁朔風哀

明朝此地看山色愁絕還登百尺臺

姚舜牧

落石山

一徑斜通石洞幽危梁曲磴是仙遊
禪關雲擁千年樹野艇星浮數點鷗
莫道迷津能進棹須知大壑可藏舟
海陽處處皆蓬島何必崑崙十二樓

林章

暮春登燕子磯懷古

揚子江南燕子磯
楊花燕子一時飛
六朝人物空流水
兩晉山川盡落暉
草色遠迷瓜步去
潮聲暗打石頭歸
倚闌天際春三月
惆悵東風動客衣

吳門秋日送族人南還

百花洲畔木蘭船
杯酒西風思黯然
客似長卿遊已倦
人如小謝別堪憐
江城暮色初回月
野樹秋聲盡入蟬
明日姑蘇臺上望
片帆落處是南天

趙南星

燕子

漸見年來燕子稀
香泥何處戀忘歸
竹亭草閣簾虛卷
樹杪雲邊影乍飛
社日屢看時節爽
舊巢忍與主人違
蕭條景物殊疇昔
歎息林中事亦非

李化龍

秋日飲張司理

關河秋色晚蒼蒼
江畔逢君更憶鄉
海內弟兄多意氣
天涯雲物摠淒涼
三山木落啼猿急
八月風高旅雁長

此夕燈前拚盡醉故人明日棹相將

登醫無閭山

天柱高標九域東振衣萬里受雄風
雲煙低擁黃龍府日月高懸黑帝宮
截海帆檣來徼外防秋士馬下回中
分明半壁歸撐拄合有明禋禮上公

邢侗

用蘊學士待命長山許枉涕園詩以奉遲

擊節曾同雪夜歡別來翻覺會時難
愁隨南陌暮雲遠

夢落東風春雨寒病裏書從前夕寄酒邊花是異鄉看
即今聖代思公等一為蒼生起謝安

送濟南趙太常起家大京兆

三輔風煙傍紫清徵書十道及躬耕起家杜曲新京兆
入對齊川舊伏生篋裏殘荷留野服馬頭斜月引王程
太常不忘玄都觀重問繁桃醉玉笙

寄徐茂吳

攝琢江城事已非宦情原與世情違歸來負郭無田宅

到處寒波有釣磯
啼鳥似關愁客語
亂雲如曳故人衣
知君詞筆頻年健
幾向秋空詠落暉

秋日百穀以其羣從見存把扇對酒漫賦寄懷
愛弟鄰莊意氣雄
托將書札反秋風
乍拋漁獵遊初薄
纔隔池塘夢已工
狼籍素紈霜杵色
綢繆香露菊花叢
相看兩地成追憶
練影雲封入望同

范涑

浣花溪

百花潭接浣花溪，饒笑堂開傍水西。
新綻天桃微帶雨，輕飛柳絮半沾泥。
尋芳力倦年非壯，懷古愁多日欲低。
回首白雲家萬里，深林偏喜杜鵑啼。

鄒迪光

中秋虎丘紀勝

琳宮十二夜生光，車馬闐駘選佛場。
水月競邀羅綺色，梅檀都作麝蘭香。
林間度曲烏棲急，石上傳杯兔影涼。
金虎高墳勝遊地，玉魚銀海正茫茫。

雨後上湖心亭待月

雨過澄湖一掌平，
脩然人似坐瑤京。
丹梯刻鳳臨層漢，
翠棟銜蜺截太清。
燈火寥寥天宇濶，
香波閃閃月痕生。
誰歌一曲滄浪調，
能使塵心想濯纓。

沈璟

酬澤民見懷之作

何來雙鯉漢江頭，
江水西南萬里流。
高枕青山家負郭，
開襟白日賦登樓。
洞庭葉下孤雲晚，
夢澤寒深五月秋。

珍重芳蘭堪作佩
湘皋搖落不須求

韓子祁

煙雨樓

層樓百尺點空濛
東指蓬壺一葦通
春雨自添湖上碧
晚霞輕抹浪頭紅
萬家煙火浮天外
午夜星辰落鏡中
醉坐漁磯還獨酌
却將鴛渚作鰲宮

沈懋學

次別曾直卿太史

年來多病檢方書夢入雙溪把釣餘
賈誼豈能收涕淚嵇康元自愧癯疎
翻愁草色春將晚却笑桃花錦不如
戀別可堪風雨夕江天搔首坐躊躇

御選明詩卷八十五



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷八十六

詳校官原任主事臣李斯咏

欽定四庫全書薈要卷一萬八千五百八十六

集部

御選明詩卷八十六

七言律詩十九

馮琦

遊廣福寺

山有仙人博處

對削雙峯小徑開
丹梯翠壁轉縈回
空香縹緲諸天下
秋氣蕭森萬壑來
青草斷碑餘古洞
白雲殘局冷仙臺
山僧野老堪同坐
海鶴汀鷗莫浪猜

秋夜獨坐偶成

丹鳳城西小苑開，夜深清露冷蒼苔。
寒星歷歷疎螢度，落木蕭蕭候鴈迴。
涼雨乍收雲滿樹，碧天如洗月臨臺。
中宵不掩雙扉卧，恐有相思命駕來。

家君之官和州

鄉心惆悵白雲飛，一問郵程淚滿衣。
羈旅孤臣從此去，京華遊子欲何依。
殘霞天落濡須水，明月江空采石磯。
別後幾時書信達，只愁秋盡北鴻稀。

邢太保破倭功成以大司馬筦留鑰過家省覲
太夫人

雲霄漢闕頒新命豐鎬周京奠舊邦九列獨高蒼玉佩
六師爭擁碧油幢橫戈絕域春浮海擊楫中流夜渡江
聖主憂先根本計留侯籌策況無雙

鄒元標

山行聞鷄

亭午荒山聞遠雞孤征遙向夜郎西分違悵望飛雲久

起舞愁驚落日低
逐客馬前春寂寂
王孫天畔草萋萋
思鄉故國情無限
回首風煙路幾迷

草堂雜興二首

柴扉恰對玉屏峯
環合千峯翠萬重
曉映明霞侵薜荔
秋懸白雪點芙蓉
臨池自種先生柳
巢鶴宜栽處士松
借問當年遊宦者
幾人曾此躡高蹤

坐擁柴扉久不開
村園委巷自徘徊
漸看細草循階長
已見紅雲拂檻來
閒極幾尋陶令傳
情深猶憶杜陵杯

吟成信步脩然處
索笑庭前幾樹梅

晚適

城外青山列畫屏
城頭返照樹冥冥
行依曲圃花沾袖
望入孤村竹倚亭
一片好風來芟沼
半灣新月到柴扃
東臯薄暮鐘聲動
愁聽歸鴉落晚汀

陸可教

陶山幽棲寺

萬山迴合隱招提
聞說鴟夷舊此棲
三策早知能霸越

千金何意復居齊人尋古洞穿雲入木落層巖聽鳥啼
欲向山僧論往事五湖煙擢至今迷

嚴一鵬

清明日賈弘菴棲隱園社集

春風吹拂柳絲斜佳節相携感物華共有錦囊題白雪
未須金管勸流霞人行磴道初如蟻日落湖帆盡載花
散步踏芳歸任晚城南猶有未棲鴉

馮夢禎

方伯文明府招遊溪上

春山郭外遶澄溪，放鷁中流綺饌齊。
樹色盡滋青嶂雨，鶯聲不斷綠楊堤。
危梁截水平飛瀑，複閣凌空半入霓。
極目鄉關雲霧裏，此身已在萬峯西。

徐桂

詠新柳二首

掩映朱樓蔭曲池，霏微芳樹早含滋。
枝枝水畔纔舒眼，葉葉風前乍展眉。
未許漫天輕作絮，且教拂地有垂絲。

征人遠道那堪折休共梅花遂裏吹

條風一夜乍回枯黛色和煙半有無玄灞柔條堪繫馬
白門疎影不藏烏樓頭寒映羅衣薄曲裏風驚紫塞孤
春水淩波春草碧等閒芳歲莫教徂

朱維京

飛虹橋

鯨海遙涵一水長清波深處石為梁平鋪碧甃連馳道
倒瀉銀河入苑牆晴綠乍添垂柳色春流時泛落花香

微茫迥隔蓬萊島不放飛塵入建章

陸懋龍

湖樓雨集

不量晴雨便稱危雨過樓頭別一姿
畫壁雲香從座起筠簾風影逐波移
歌殘燭灺春衣怯語雜觴飛夜漏遲
帶濕管簫疑半咽城烏啼上隔牆枝

傅光宅

春日花下有感

江月江煙望白門春風春雨自黃昏年年楊柳無消息
夜夜梨花有夢魂蘇小香車松下路莫愁芳樹水邊村
緘情欲寄雙飛燕腸斷迴文是淚痕

馮大受

迴瀾臺

在郡城之西先祖廷尉公築
砥柱中流一郡之大觀也

平蕪漠漠水泓泓目送煙霞萬里清小雨挾雲歸斷岸
亂帆拂柳渡孤城江銜睥睨寒星沒海近樓臺霽色平
獨立中流雄砥柱令人俯仰寄深情

夜雨舟中不寐

雨帶秋風秋思生孤舟旅泊夢難成
盡添玉漏今宵永直把銀河一夜傾
起坐不禁蓬底濕挑燈聊得燭花明
無端忽過天邊鴈嘹唳愁聞三兩聲

秋水

氣爽高秋天地清方諸應候百川平
寒搖夢澤流雲影冷浸瀟湘夜月明
一色混涵連碧落三山浩渺接蓬瀛
那堪極目蒹葭外忽漫懷人感自生

客中九日

帝城佳節又重陽聊為登臨一望鄉
萬里高秋來爽氣
千山寒碧洗濃妝
丹楓江上飄霜冷
黃菊尊前對酒芳
正憶茱萸兄弟會
忽驚歸鴈兩三行

黃克纘

將出都門和潘王見懷韻

平臺跼履憶當年
榆莢楊花四月天
授簡總慚枚叔賦
耽詩獨記楚王賢
寒嘶匹馬春明外
晴落孤鴻魏闕前

南去虔州千萬里
薊門章水各風煙

許弘綱

丁酉再告

多病年來不耐官
柴門柳色意中看
偏於萼菜思張翰
自分圍棋老謝安
長日生涯惟點易
故人書問且加餐
畫溪煙雨春蓂綠
重與君王乞釣竿

余寅

送包明臣之任潮陽簿

七閩路盡是潮州莽蕩風煙漲海頭
溪洞水腥常作霧
枕椰葉暗不知秋琵琶洲畔蛟為窟
甲子門前蜃是樓
只有羅浮山色好蕭齋長得破羈愁

楊于庭

贈李修吾轉南祠部

見說君王已賜環金陵亦在五雲間
兩都爭識神仙吏
三禮仍居侍從班
伏枕鄉心懸碣石
挂帆秋色照鍾山
謝公墩上重回首
絕代風流尚可攀

章嘉楨

立秋後一日張家灣訪元采曹長於胡氏園亭
昨夜秋風一葉傳
潞河風物曉澄鮮
雨餘沙白垂疎柳
雲際天青集畫船
閑向園林尋舊侶
坐譚騷雅聽鳴蟬
芳尊曲沼幽香遠
忽憶江南唱采蓮

朱國祚

聞蟬

燕臺歇雨薦涼颼
吹送蟬聲滿御墀
清影不教塵外見

長吟先入禁中知上林氣暖枝堪託仙掌秋高露復滋
撫罷五絃聽漸遠空庭疎樹午陰垂

徐五脩招遊九峯三泖之勝晚過斜塘賦此

月落風微何處鐘斜塘岸岸柳惺忪疎星數點布碁局
宿鳥一羣衝釣舸潮水漸生黃歇浦野花齊放陸機葺
故人擬贈丹砂訣商榷栖山第幾重

自北鴈蕩踰南鴈蕩觀龍湫瀑布作

靈域峇堯隱不知中藏七十二峯奇披衣正在煙深處

到面初無雨歇時謝客未曾經蠟屐貫休已後少題詩
洞天只恨流傳晚莫覩蟲書鳥篆碑

劉應秋

送林仰晉謫茶陵

夕郎抗疏出金扉萬里衡陽一鴈飛世路何年遷客少
聖朝今日諫書稀黃陵雨暗連青草嶽麓雲深濕翠微
千載汨羅人不見寂寥心事更誰依

葉向高

送林客部南歸

幾年共逐帝京塵
此日那堪別恨新
畫省風流傳諫草
黃扉事業愧絲綸
故園載酒宜清晝
客路聽鶯屬暮春
君到里門應北望
長安猶有未歸人

馮元成招飲吳閶新第并遊西山

勝遊今喜到姑蘇
千里相期興不孤
雙屐時從香徑度
短筇還倩白雲扶
空山草沒支公寺
落日波生范蠡湖
此地招歡難別去
夜深猶自聽啼烏

方應選

春闈登明遠樓

綺樓百尺倚雲開
矯首河山爽氣來
露拂金盤仙掌動
月侵銀榜夜珠迴
青藜故傍三台映
綵筆爭看五色裁
燕市只今多駿骨
春風紫氣滿高臺

嘉樹林聽鼓琴

十里風煙結紫岑
千年嘉樹自成林
白雲不礙拏舟路
紅葉猶餘覆殿陰
冒雪偶乘王子興
聽琴還解潁師心

清宵寒氣淩孤榻最愛松關閉獨深

贈醉茶居士

山中日日試新泉君合前身老玉川
石枕月侵蕉葉夢竹爐風軟落花煙
點來直是窺三昧醒後翻能賦百篇
却笑當年醉鄉子一生虛擲杖頭錢

賦得潮平兩岸濶

曉風初靜浪花輕十里晴川一望平
蛟窟夜寒雲黯淡蜃樓煙散月分明
釣磯半入蘆花影漁笛遙連沙鴈聲

却愛茫茫秋水色
羊裘何處不逃名

姜應麟

秋懷

廿年投老此山丘
倚杖閒看水獨流
萬樹秋聲連斷峽
一天涼雨過層樓
因題楓葉開詩卷
為訪蘆花上釣舟
日靜衡門無剥啄
忘機惟得伴沙鷗

于若瀛

雨宿潼關

明燈虛館淒清夜細雨蕭蕭亂客腸秋入闌門悲鼓角
年來驛路老星霜家臨濟水菰蘆白壠接南山黍穀黃
千里故園愁阻絕夢還京國亦他鄉

時寄家
京邸

寄隱閣春興

小閣逶迤近水渠蕭條不讓野人居惟將藥裏供多病
不為花飛憶敝廬嬾散江邊清夢穩交遊天上故人疎
亦知衰晚甘淪棄世事浮雲任卷舒

徐學聚

夜宿日觀峯禪房

岱宗面面削芙蓉時有卿雲出漢封
杖屨中天干象緯
風煙下界起蛟龍
河流舊繞滄溟遠
練影斜懸紫翠重
夜半石牀天籟發
夢中錯認景陽鐘

來三聘

解悶

春風吹暖百花新
院麴香浮竹葉春
今日酒拚今日醉
一年花老一年人
浩歌聊借鶯為管
醉卧何妨草作茵

高興未闌天欲暮攜壺帶月問西鄰

朱長春

登金山

雲亭中峙最高頭俯出晴江萬里流
夕日半窗孤嶂迴
人家兩岸暮煙秋
禪宮晉代丹青舊
詩碣唐人苔蘚留
無限登臨懷古意
海門風落使人愁

漫題樓壁

南高峯底礪西樓
借我停居作卧遊
山塔浮雲當落照

寺門古石隱江流雨中滿地收秋果日下鄰家放晚牛
樵唱僧鐘行處是煙霞丘壑正堪留

移家四首

錄二
首

翠竹新栽映白沙碧湖深處是吾家欲逃城市移居遠
頗有山林發興賒野鳥乍過窺几席鄰人相見饋魚鰕
蓬蒿不比揚雄宅翻喜門無載酒車

桑青杏白野田香浴鷺飛鳬煖渚長畫艇春遊山靄靄
雲帆時度水茫茫一尊行樂依花塢雙鬢偷生托藥囊

便與妻兒成避世他時雞犬即仙鄉

徐三重

途中除夕

故國愁心對落暉漏聲忽報歲華歸寒梅殘夢隨江月
古道征塵上客衣北極遙連雙闕迴南山迴望片雲飛
高堂此日嗟遊子清夜猶憐獨倚扉

春雨

春來江畔雨初霏遠樹和煙接翠微新草忽驚侵去路

暗塵無復到征衣
山圍故國浮雲暮
路入寒塘楊柳稀
愁對梅花一回首
漫依歸鴈却西飛

湯顯祖

卧邸寄帥思南

卧病高齋倚葛巾
陌頭何地著清真
晝長門簿添過客
夜短窓紗減侍人
西郡酒泉那可乞
南城冰井復無因
惟堪夢裏期心賞
竹簞花溪過酉辰

即事寄孫世行呂玉繩

平昌四見碧桐花一睡三餐兩放衙也有雲山開百里
都無城郭湊千家長橋夜月歌攜酒僻塢春風唱采茶
即事便成彭澤里何須歸去說桑麻

遣夢

休官雲卧散仙如花下僧殘過客餘幽意偶隨春夢蝶
生涯真作武陵漁來成擁髻荒煙合去覺褰帷暮雨疎
風斷笑聲弦月上空歌靈漢與踟蹰

送劉參藩寄問東莞覃見日盧海疇諸子

曲江春老賦停雲病淺臨風一送君
暫有公榮宜對酒
那堪孫楚即離羣
高餐露菊逢秋盡
細語霜鐘入夜分
更折梅花問耆舊
羅浮清隱最相聞

送費師之寄北鄉

未須裘馬去翩翩
風物名家自儼然
數幅輕羅留結夢
一杯芳草寄題箋
青衫客散河橋柳
暮雨春歸寒食天
定向林間呼小阮
荷湖新著釣魚船

黃居中

有渚軒宴集用韻荅潘景升軒以顧渚茶得名
余與景升不善酒而有茶癖故云

獨醒慙逋酒債頻隨君啜茗坐花茵酒樓邀月人懷楚

茗渚抽煙鳥報春

顧渚山有鳥喚春來去採茶人呼為報春鳥

話到丁年驚

逝水歌翻子夜動梁塵猶憐擲果當年客日日江皋賦
洛神

薛三才

春暮花圃即事

退食閒亭自委蛇憑軒忽漫問花期韶光已過九十日
闌藥纔舒三兩枝乍和酒香風細細長留春色景遲遲
看來最是牽情處嫋娜晴絲百尺垂

何喬遠

湘南雜興

桂林秋色滿清湘天畔登臺百粵長南入交州多薏苡
東來海國有扶桑雲浮衡嶽窺三楚風馭羅浮限五羊
鴻鴈稻粱無信息不知何地望江鄉

袁宗道

游百尺泉

青嶂峇崑赴郢東寒泉飛處鬱嵒龍諸天晴灑千林雨
六月涼生萬壑風小入傍崖驚浴鷺斜穿曲澗掛飛虹
片時徙倚翻成惜只恐移家老此中

春日閒居

人間何物度朝昏嬾性新來更厭喧除却跣趺惟飲酒
纔聞呵殿便闔門虛窗月上摹松影塵榻僧來印衲痕

獨有盆梅嫌寂寞故舒丹蕊照清樽

讀李洞詩

不才敢擬子雲玄索米金門又一年風味漸隨雙鬢減
天真猶仗一尊全破冰滴硯晨箋易掃地安單夜坐禪
閒洗磁瓶烹芥茗故人新寄玉山泉

雪中共惟長舅氏飲酒

盆梅香裏倒清卮閒聽羣鳥噪凍枝飽後茶熏真易策
雪中酒戒最難持爐心香燼灰成字紙尾書慵筆任歌

共話當年騎竹事如今雙鬢各成絲

袁宏道

郊外水亭小集三首

錄二首

山自蕭森澗自寒却憐勝地在長安
桐陰恰好當窗覆柳色終宜近水看
已倦呼兒猶問酒不情逢客強加冠
湘江亦有幽居處多少芙蓉憶釣竿

幽篁夏夏坐來清懶慢都無對客情
戲水鷗雛分浪出趁巢烏母曳枝行
堂前羯鼓人三爵花下彈棋鳥一聲

紅藥青軒如夢裏幾年塵傍馬頭生

別王百穀

河上清霜鴈字斜西風匹馬又天涯錦帆涇遶郎官舍
冠子橋通處士家好事每供梅月水清齋長試穀前茶
東憐不是無妹子眼底何人解浣紗

皇甫仲璋邀飲惠山

東風吹水浴平沙鷗鷺鵲滿釣槎去日翟公猶有客
到來潘岳已無花谿鱗唼雨層層浪山碓春雲處處家

白石青松如畫裏臨流乞得惠泉茶

和萃芳館主人魯印山韻

愛看幽鳥曝新陽每遇嘉陰即倒觴
盡日竹煙消酒去有時鶯語入簾長
春塘雨過波紋亂花塢風迴蝶翅香
行到碧橋深柳處一帆涼月滿吳航

柳浪館

徧將藍瀋浸春顏風柳鬢鬢九尺鬢
鶴過幾迴沈影去僧來時復帶雲還
閑疏滯葉通鄰水擬典荒居作小山

欲住維摩容得不湖亭纔得兩三間

託龍君超為覓仙源隱居詩以寄之

雲石村中且卜廬憑君為買一峯餘全栽芝菊為疆界
盡寫雲嵐入券書門對仙童澆藥地巷通毛女浣花渠
閒中每愛天台去好與劉晨間屋居

久雪忽晴喜而有作

殘花殘木總精神纔見寅年一日春柳態美如新櫛髮
山容親似遠歸人閒追老衲三餘輩更踏泳池五六巡

江郭早須騎馬出旋呼稚子覓頭巾

別龍君超君御兄弟

青鞋不破武陵春歸去西風一面塵
荷葉山頭聞杜宇
余村居名桃花源上別秦人
深村稻熟泉當戶廢苑茶
荷葉山香寺作鄰可是無花無地主
祇緣無計得分身

歸來

歸來兄弟對門居石浦河邊小結廬
可比維摩方丈地不妨揚子一牀書
蔬園有處皆添甲花雨無多亦溜渠

野服科頭常聚首
阮家禮法向來疎

素中道

同減顧渚謝在杭
秦京避暑天寧寺樹下

槐陰竹影亂禪牀
彈指颺風滿院涼
亂石生雲迷海岸
疾雷驅雨過江鄉
奇峯忽散天如拭
晚日重來樹有光
乘興共移池上酌
藕花泣露散幽香

南陽邸中飲同年羅子

一聲殘滴下疎楊
和露和煙浣客裳
駑馬無心遊宛洛

故人相對是瀟湘春來藥裏閑花事雨後蔬盤照酒觴
屈指羅舍居漸近叢蘭開處滿山香

小竹林贈別傅叔睿

鹿牀深處且從容吾子風流不易逢張緒通身如嫩柳
謝郎五字似芙蓉月來池上花光淨雨過園林竹露濃
若使前生非大士如何一見問空宗

得勝門淨業寺看水同黃慎軒兄弟

南人得水便忘憂兩日三番水際遊花露沾衣濃似雨

潭風著面冷如秋
拖莎帶荇流何急
擲鴈拋鳬浪未休
天外畫橋橋上柳
祇疑身在望湖樓

投贈太保塞令公三首

天家鎖鑰重漁陽
親遣元臣鎮塞荒
白羽扇中麾屬國
青油幕底拜降王
鶯花煖送千門雨
介冑寒生六月霜
身事累朝關社稷
中宵私語跪焚香

塞北重欣借寇君
琵琶曲裏奏功勛
校書百帖高連屋
種柳千行翠入雲
魯國到門諸弟子
漁陽迴席舊將軍

太平銷盡干戈氣閒却素家倚馬文

太保曾督學山東

屹然全似魯靈光虎峙龍蟠狐兔藏處世心同羊叔子
立朝歲比郭汾陽止將文酒銷戎隙懶把笙歌貯畫堂
擬報國恩歸未得夢中常到午橋莊

渡黃河

如雪寒沙千里平猛風雖盡浪猶驚草經青女全無色
鴈過黃河別有聲騎馬久無浮宅夢倚篷忽動蕩舟情
可憐廣武山常在寂寞誰知豎子名

由蕪湖入新安道上

春水平田鷺一羣黃花陌上野香薰若為雨霽猶屯霧
總以松多易染雲洞拂古莎來鹿女原留新跡過山君
馬蹄閑踏蕭森影夜月朝曦兩不分

沈瓚

郡中寓樓詠懷

椀茗爐香手自持林光草色共含滋交游漸斷難忘酒
風雨雖多不廢詩客舍食飭花落後新泉烹笋燕來時

何妨長作樓頭主無事偏于懶性宜

張君為余貌小像二一野服一冠裳皆肖戲賦
一律效長慶體

荷衣芰製舊丰神束帶簪冠自主賓
賸有丹青稱獨出頓令形影共三人
若為濃筆兼枯筆莫問前身與後身
欲識生平丘壑意請從阿堵辨吾真

梅花詩

隔塢亭亭趣水斜紙窗雲暗竹交加
月痕隱約還添影

風信顛狂每妬花幽意半銷春草岸殘香分入午蜂衙
千迴繞樹吟詩立西日林中對浦沙

徐燾

旅次石頭岸

石頭城下水微茫回首鄉關驛路長瓜步煙波連斷靄
秦淮雲樹隔斜陽秋高落木迷村舍夜靜寒潮到女牆
客裏愁心已如此一聞南鴈更淒涼

送邵武李太守擢憲滇南

昆明池水靜無波擁傳新從轅道過開府定能寬漢法
采詩曾不廢蠻歌赴墟滇客龍名市納款蠻王象渡河
他日勒功留片碣點蒼如黛石磋砣

徐勣

宿鄧汝高竹林山莊

精廬遙結翠微間借得雲窗一夕閑流水斷橋通古路
斜陽殘磬下空山犬聲似豹聞茅舍螢火隨人入竹關
桑柘滿村堪寄隱與君吟卧却忘還

旅次石頭岸

縹緲孤城見石頭長懷雲水自悠悠
孤村柳色連荒驛兩岸蘆花隱釣舟
殘月微鐘京口夜澹煙疎雨秣陵秋
客中不盡懷鄉感南鴈一聲雙淚流

過荆嶼訪族兄文統逸人隱居

蹤跡經年懶入城滿村麻苧綠陰晴
蝶尋野菜飛無力蠶飽柔桑齧有聲
半榻暮雲推枕卧一犁春雨挾書耕
清高學得南州隱不忝吾宗孺子名

送林吾宗之金陵

青絲遊騎踏春蕪二月王孫入舊都
柳色東風村店路杏花微雨酒家壚
斷橋野草尋朱雀古碣荒苔辨赤烏
挾得紅妝歌子夜寒潮雙槳莫愁湖

巢雲院

石勢參差若累成夕陽斜照海波平
苔封古路花深合樹隱懸崖葉倒生
入院亂穿雲影去上山遙逐澗聲行
巢居隱士知何代千古無人記姓名

蘆花

江畔洲前白渺茫
蕭蕭撼撼鬪秋光
輕風亂歎漫天雪
斜月微添隔岸霜
半夜鴈羣清避影
數聲漁笛澹吹香
瓊枝玉樹分明見
愁絕懷人水一方

徐珍伯招遊惠州西湖得西字

十里湖山碧樹齊
遙聞鐘磬出招提
萬家暮靄鷺城北
一抹殘陽鷺嶺西
菱葉颭風浮淺水
蓼花吹浪過長堤
蘇公此地曾遊咏
自愧詩成不敢題

別在杭次韻

頻年作客若為情
兩度題詩送我行
暮雨魂消江鴈影
西風腸斷峽猿聲
窮秋野柝雲邊驛
午夜清砧水畔城
從此相過蹤跡少
積芳亭上月空明

曉渡彭蠡

彭蠡秋高水接天
征帆一片去茫然
蘆花飛楚岸千重雪
樹擁康山幾點煙
報曙野雞殘月後
失羣寒鴈曉霜前
客行不耐風波惡
魂斷漁歌到枕邊

閑居

竹滿簷楹草滿除青山應屬野人居
未春預借看花騎
欲雨先徵種樹書石鼎香酣吟懶後
瓦鐺茶熟夢迴初
半生消受清閒福一任人嗔禮法疎

圖南王孫移家西山賦贈

從來生長在朱門今日移家入遠村
晴放好山當屋角
暗通流水過籬根應門但委栖松鶴
摘果頻勞掛樹猿
只為欲成鴻寶訣故尋幽僻避塵喧

送商孟和應試留都

新柳如絲拂地齊送君遙向石城西
春明草色迷牛首秋老槐花上馬蹄
二水煙波移舴艋六朝鐘磬認招提
讀書借得憑虛閣古埭霜寒聽曉雞

二月晦日同喻叔虞張紹和郭汝承集商孟和
玄曠山房分得巖字

春草芊芊絲未艾別開芳墅隔塵凡
小樓斜倚將枯樹絕磴傍通欲斷巖
寒信催花三月近夕陽流影半峰銜

攜來茗椀堪供客
新啓旗槍白綃緘

送俞本之遊楚

寒皋木落水連天
雲際孤城望漢川
隔岸數聲湘女瑟
中流千里鄂君船
鷓鴣夜叫黃陵月
猿狖秋啼赤壁煙
挾得離騷經一卷
行吟長對楚江邊

驛樓送惟和兄北遊

夜靜江空欲上潮
榜人催喚解蘭橈
離腸禁得幾回斷
別夢不辭千里遙
沙起交河陰漠漠
風吹易水冷蕭蕭

關山迢遞何時盡此是他鄉第一宵

送沈廣文擢德清令

新懸墨綬謝青氈仙令栽花向霅川處處勸耕黃稻雨
村村收繭綠桑煙官清但飲雙溪水吏散閒尋半月泉
莫戀彈琴寬賦稅司農方急水衡錢

焦竑

憶別

懷人幾上越王臺雲鎖空林首重回夜雪有情憐獨往

春風無恙不重來
愁邊短榻寒禽下
病起新篇過鴈裁
三逕荒涼羊仲老
傷心開落退園梅

送吳伯恒太守之杭州

東方千騎擁征橈
涼入離亭酒半消
天竺鴈來芳草歇
秣陵人去碧雲遙
六橋衰柳吟風葉
八月寒江急暮潮
君到扁舟勞問訊
有無高士在漁樵

送君錫遊金焦二山

雙崖出水勢堪凭
才子乘春快一登
檻外煙巒低北固

望中雲樹接金陵風回兩岸聞人語雨過千帆亂佛燈
好為吾家尋舊隱洞門蘿薜翠層層

吳道南

送朱養淳太史典試江右

紫陌新輶夾道看詞臣分命出金鑾片帆左蠡乘新漲
一榻秋屏對早寒南國文裁運斤手西江派重采詩官
何當更問間閭苦歸與君王策治安

陶望齡

覽鏡

莫恠年時愛道裝姓名久已隸空王六時自禮蓮花漏
每日親拈印字香詩景天和邀客和衡門草長與人長
夜燈點罷仍朝梵靜業山中也覺忙

小園

滿窓煙翠鏡湖南隱士圖書海岳菴畫艇故教藏五柳
啼鶯頻與喚雙柑泥人山似當春睡中酒花仍白晝酣
已插疎籬護芳草更添微徑擬三三

湖上新屋成

東西坊本依城市大小山今有弟兄擬卜幽棲分嶺翠
好憑竹閣聽泉聲倦同飛鳥投林急慵愛蝸牛戴屋行
湖上一椽聊爾爾扶犁權與老農耕

陳侍御西湖莊

名場羨爾一身收墨詔新銜拜醉侯艇子舊裝蓮葉樣
吳兒殊有串珠喉輕輿軟逕花間馭晚翠朝煙水上樓
我有清狂公記取十旬三度淨慈遊

送詹生

了無經術只甘眠且免門人笑腹便隔歲豈堪繙舊歷
廢琴端為發新絃低頭我已推東野高足誰能似鄭玄
莫惜湖亭暫時語夜潮偏送上灘船

東山

竹梢藤蔓冷僧扉門外蒼松忽減圍

舊多老松夾道近
為人伐存者皆穉

斲藥更誰悲遠志摘花猶得訪薔薇落潮漁艇晚初閣
上浦風帆健欲飛絲管暮年陶寫盡謝公何日復東歸

與季豹遊雲門

叢竹生鞭晚稻齊石橋重訪古時題
谷雲未出俄成雨
簷瓦初鳴已漲溪
月氣忽穿殘蛻斷
亂山翻在夕陽西
秦碑解讀隨君讀
苔磴從高不濕泥

董其昌

送喬黃門

夕郎何事厭承明
結束征衣節候更
汲孺在庭推直道
虞卿捐印見交情
關山歲晏黃河闊
邊塞春深白草生

總是離愁心折處壯君駿馬太縱橫

義興作

獨將長劍倚秋空不道荆溪亦路窮問我姓名惟應馬
向人衣袖指歸鴻煙蒸曉岫全籠碧霜入疎林欲變紅
行子已諳搖落意未妨身世有牆東

贈狄將軍

急管繁絃寫竹枝聽來不作異方悲六千君子舊名將
兩隊美人新教師便許羈心拚綠醕能無佳句比紅兒

若論湖海鷗盟在再入花源未可知

馮觀察元成治第東有繡佛西置萬卷牡丹盛
開命酌漫賦

名園占領豔陽多未似沈冥廢嘯歌坐竹興仍修禊後
看書愁奈送春何窗前散綺搖書帶臺畔凝看亂鉢羅
莫向花叢問姚魏年來蝶夢不曾過

傅新德

送郭青宇參藩巴蜀

殊方幾載歎離羣
忽漫相逢又送君
萬里江湖龍劍合
一尊風雨薊門分
峨岷迴出天連雪
棧閣平臨馬度雲
蜀相威名應不負
他時消息好相聞

送董兵備衡水

帝城南望楚江開
捧檄人看日下來
萬里春光明使節
千年王氣接金臺
雲連湘浦雙星度
天盡衡陽一鴈回
今日長沙同內地
逢時翻羨洛陽才

黃輝

送梅禹金還宣城

北風吹雪亂征塵，野寺離觴不記巡。
歌筵動迷追賞地，琴書偏泥倦遊身。
來時柳絮如今日，去後梅花是故人。
及到敬亭相憶否，東山女伎正迎春。

次韻答江進之見贈

簿領如山蛻骨餘，散曹日與列仙居。
新知總入逃禪酒，往事都成解夢書。
身外姓名空自縛，年來容鬢定何如。
長安雨後西山近，疲馬安於四望車。

贈鄭使君開府勛陽

肘懸金印鬢初斑
遙望勛陽錯繡間
自取赤文開地軸
真同玄武鎖天關
衣袂斜綰三州水
劍脊平分兩戒山
榮衛清香雲氣裏
謝羅仙跡好追攀

方大鎮

塗太僕揆宇先生滇中寄書附答

白雲迢遞點蒼居
十載關心萬里餘
枕上西風孤客夢
天涯北鴈數行書
黃花並憶漳河賦
綠酒相從上谷車

夷蹠報施無定論燕山迷望轉踟躕

章士雅

秋雨

秋雨秋風入暮天
愁心獨與片帆懸
總教作客非千里
堪笑為郎已六年
蘆葉半黃風破岸
稻花全白水平田
棲遲歲月憐今昔
梁父孤吟倍黯然

憶小園花事

天南人去二三月
小苑花飛五六枝
孤閣自開巢乳燕

疎簾不捲駐遊絲
園蔬未作愁中供
芳草還虛夢裏詩
最憶東鄰夜吹笛
一聲遙在月明時

別思

東方千騎去如雲
最有羅敷念使君
曉鏡疎花看寂寞
夜香明月坐氤氲
門前細雨新桃浪
陌上和風舊燕羣
莫道朝來無錦字
落花飛處半迴文

天雄道中

天雄自昔推雄鎮
鎖鑰於今重北門
河近白溝人不渡

關連紫塞戍常屯重陰卷雪冰還合朔氣吹沙日易昏
極目荒原無匹馬車輪何事促王孫

姜志禮

送夏鶴田給諫使琉球

聖朝雨露海東頭玉節翩翩覽勝遊
萬里星槎銀漢杳三山風馭碧天秋
扶桑曉日迎青瑣瓊島春雲駐絳驄
聞道南金煩大舶輜軒何以荅宸旒

吳正志

雪後城上晚眺

同雲乍斂晚峰青
城上臨風酒半醒
滾滾溪聲春作浪
英英雪色玉為屏
柔條欲動猶含凍
嬌鳥初啼未慣聽
漁火不知何處泊
碧煙寒影共冥冥

詠庭中西府海棠

雨霽羣蜂罷午衙
婆婆娑娑嘉樹鬪芳華
分來海上仙家種
散出空中天女花
旭日半舒西蜀錦
輕雲遙映赤城霞
移燈照處人如玉
燦燦餘輝射碧紗

鄭明選

上渡即事

上渡人家生午煙青絲絡馬寺門前纖纖杜若風香細
翦翦梭擱日影圓疊嶺遙來彭澤鴈晴江爭落信州船
村中父老知農候拄杖南疇課種田

王士騏

上張燈後苑以麥燈居中吾州所產也

江南五月麥初黃野老慇懃進上方織就絲絲冰比潔

鏤成葉葉玉分光誰高市上千金價不比宮中七寶裝
聞道聖人昭儉德瑩然一盞照中央

高克正

次壁東

雨濕征衣過遠村恰逢池上狎鷗人家疑避世桃源地
身似投竿渭水濱皓首杖鳩強飯足蒼頭折柳踏歌新
高堂鶴髮年相埒回首雲鄉思轉頻

徐必達

讌集中山

幘山山寺倚江隈
脫幘仙人去不迴
華頂峯連雙塔迴
海門潮湧片帆來
疎松礙月娟娟淨
細竹含風个个開
握手共成雲外契
一回清話一傾杯

謝肇淛

送徐興公還家

楓落空江生凍煙
西風羸馬不勝鞭
冰消浙水知家近
春到閩山在客先
斜日鴈邊看故國
孤帆雪裏過殘年

憐予久負寒鷗約
魂夢從君碧海天

十月吳江舟中晚望

年年改歲常為客
無奈愁心付酒缸
寒鴈背風歸越渚
孤帆帶雨下吳江
黃知霜後柑三寸
白起沙邊鷺一隻
日落洞庭天似水
青山無數入雲窗

送孫子長之澣墅

度支使者權吳闕
飽看姑蘇郭外山
稅減任教商舶過
吏稀長對戟門閒
灣中銷夏留僧住
橋上行春載鶴還

西望吳興衣帶水舊時玉筍已成班

唐之屏

登金山

一柱東南表地靈芙蓉萬古插清泠
江淮潮色無邊白
楚蜀山光不斷青
鯨吸風雷波自撼
龍過樓殿雨猶腥
枕流無限滄州意
極目何妨我獨醒

韓上桂

歸里

栗里歸來尚未荒
蘼葭深處水周堂
一雙白鴨對人語
七尺青梭共我長
穉子能尋蝴蝶墮
村姑不少鷓鴣香
此中嘯傲翛然足
休對仙家問海棠

陳如京

落花

萬樹陰陰春已闌
綺霞浮水動波瀾
半將豔質迎風舞
散作香魂共月寒
銀蒜低垂紅雨急
金鈴忘綴絳苔殘
不知遊冶尋芳處
無限葳蕤藉錦鞍

季秋赤城衙齋晚眺

北望仙山一帶斜，千巖分映赤城霞。
山隈隱處茅茨出，村逕低回薜荔遮。
桐樹早凋風似雨，楓林晚醉葉疑花。
坐來不覺煙光暝，回首西峯散暮鴉。

陳薦夫

和興公春日閒居

開簾風颭煮茶煙，春半亭臺雨後天。
仄徑花茵防鳥蹴，古牆苔篆愛蝸緣。
課兒易傳翻王弼，荅客詩箋出鄭玄。

竹影滿窗綃帳靜方袍閒擁日高眠

和有道村居漫興

茅屋疎籬寄水鄉
隔溪漁火照昏黃
聯翩塞鴈低河影
明滅山螢撲夜涼
花隱砧聲催玉杵
葉傳秋信到銀牀
芒鞋竹杖閒行處
一路柴門晚稻香

海口城晚望

蒹葭藹藹樹蒼蒼
平楚閒看益渺茫
驛路遶山多落木
孤城臨水易斜陽
潮迴近浦寒生雨
鴈度遙天夜帶霜

暫息征鞍瀛海上煙波千里斷人腸

陳繼儒

贈馮岱宗

少小才名擅擅場青山副本不須藏車中滿載三千牘
屋後貧栽八百桑池草墨酣橫鳥跡土花鐵冷繡魚腸
好將一片煙霞骨香案前頭侍玉皇

寒食

柳絲燕子故飛揚杜若蘼蕪接路香每過可憐寒食節

回思真負少年場
春深膽怯花時雨
老近情銷鏡裏霜
此日風光偏澹蕩
酒盃到手莫辭忙

白燕

紛紛白水滿春塘
淡雨微煙更渺茫
新壘落花紅粉薄
隔樓芳草雪衣涼
舞翻掌上明珠色
零落釵頭片玉香
正是懷人太無賴
五更殘月照空梁

新秋四首

一片秋聲入埜塘
西風蕭瑟響寒螿
馬嘶大漠川沙白

鷹下平原草木黃疎菊籬邊如待酒芰荷池上可為裳
懷人萬里情無限隔岸蕙葭夜未霜

悲秋無奈獨高歌歌罷其如秋色何金屋佳人啼素扇
玉門老將枕琱戈玄蟬咽露驚飛葉烏鵲披星欲渡河
聞說洞庭湖水闊朝添新綠漾微波


西望瀟湘秋水長大風初捲白雲揚銀河夜落機中錦
玉露朝侵陌上桑螢度空梁棲燕幕魚翻靜渚戲蓮房
亦知此日行吟者一段愁心挂夕陽

門掩秋風正寂寥
荒原落日草蕭蕭
獼猴趁月窺山果
鳥雀驚人下黍苗
華屋朱簾嬌白苧
疎燈角枕怯冰綃
閒來偶渡前溪口
柳葉菱花一尺潮

招馮素生入山讀書

山深日色不到地
樹老濃陰高刺天
鶴叫島池多怪石
花撩窗戶亂飛泉
偶翻古帖摹青李
閒放輕舟採白蓮
君若入林同結夏
竹風松月對牀眠

御選明詩卷八十六



總校官庶吉士臣侍朝

校對官編修臣莫瞻菴

謄錄監生臣和其聲